

阿毗曇毗婆沙論卷第五十四

西四

迦旃延子造

北涼沙門浮陀跋摩共道泰譯

使捷度十門品第四之一

二十二根十八界十二入五陰五取陰六界

二法謂色法無色法可見法不可見法有對
法無對法有漏法無漏法有爲法無爲法三
法謂過去未來現在法善不善法無記法欲
色無色界繫法學無學非學非無學法見道
斷修道斷無斷法四法謂四諦四禪四無量
四無色定八解脫八勝處十一處八智三
三昧三結乃至九十八使眼根幾使所使乃
至無色界修道所斷無明使幾使所使如此
章及解章義此中應廣作處優婆提舍二十
二根眼根耳根鼻根舌根身根意根男根女

根命根樂根苦根喜根憂根捨根信根精進
根念根定根慧根未知欲知根知根知已根
問曰何故彼尊者立二十二根而作論答曰
彼作經者有如是欲如是意隨其欲意而作
論亦不違法相彼意欲立二十二根而作論
隨其意立二十二根復有說者此中不應問
彼尊者所以立二十二根所以者何佛經說
二十二根佛經是此論所爲根本此論亦說
二十二根彼尊者不能於二十二根減一根
說二十一根增一根說二十三根所以者何
佛經不可增減無減可增無增可減故如無
增無減無多無少無益無損無量無邊亦如
是無量者謂義無量無邊者謂文無邊猶如
大海無量無邊無量者謂深無量無邊者謂
廣無邊佛經亦如是如尊者舍利弗等百千

萬億那由他論師爲解佛經二句義故造百
千萬論盡其覺性猶不能知其量得其邊際
問曰置造論者何故佛經說二十二根答曰
爲受化者故受化者聞說此法則得增益復
次此經皆有所以因緣何者是耶答曰生聞
西四
婆羅門往詣佛所問訊世尊種種語已在一
面坐而作是言說諸根者多沙門瞿曇說有
幾根耶佛告婆羅門我說二十二根謂眼根
乃至知已根如來說二十二根則攝一切諸
根義婆羅門若有人言沙門瞿曇所說諸根
我不能遮止更說餘根但有是言而無有實若
還問者亦不能知反生愚惑所以者何非其
境界故婆羅門問佛若不應廣問此經所以
因緣應問婆羅門往至佛所但問二十二根
而不問陰界入真諦沙門果緣起助道等法

耶答曰彼婆羅門所疑處便問不疑者不問
復次此婆羅門善能遊歷喜試有所問爲問
根義故經歷九十六種外道爲欲知一道
爲說幾根如尼捷子說一根謂命根是故彼
不飲冷水不斷生草所以者何於外物中計
有命根故問曰外道於外物中計有何根答
曰或有說計有意根復有說計有命根復有
說外道於外物中計有意根名有根法計有
命根名有命法或有說二根者謂業及意復
有說若眼不見色耳不聞聲是名聖修根如
西四
波羅奢等作如是說問曰何故名波羅奢耶
答曰是其人名無有難名者所以者何自有
不如義而立名復次波羅奢是其姓如婆羅
門各有別姓有姓拘蹉有姓婆蹉有姓奢緻
羅有姓婆羅墮波羅奢姓亦如是復次若從

刹利婆羅門姓生者名波羅奢猶如從驢馬
生者名爲驃評曰此姓波羅奢故名波羅奢
彼有弟子名優多羅摩納婆往詣佛所問訊
世尊種種語論在一面坐世尊問言汝師波
羅奢爲諸弟子說修根法不摩納答言我師
說之佛問云何說摩納答言若眼不見色耳
不聞聲是名聖修根時佛難言若不見色名
聖修根者盲者便是聖修根人爾時尊者阿
難侍佛後立以扇扇佛復難摩納言若汝所
說聾者便是聖修根人所以者何以不聞聲
故問曰如尊者舍利弗等百千萬億那由他
諸大論師唯佛一人能難其義辯及所立言
使令不行何故世尊作第一難尊者阿難作
第二難世尊何故而不制止尊者阿難耶答
曰佛觀阿難咽喉有相欲有所問佛行菩薩

道時不曾斷人乃至弟子亦不斷其間復次
佛知阿難所說與我所說等無有異無有增
減無增減故而不制止復次若師與弟子俱
能伏者是名善伏復次欲令外道無餘言故
若當世尊作第一難阿難不作第二難者彼
梵志還自衆中作如是說雖爲彼師所伏不
爲彼弟子所伏雖伏我等弟子不伏我等師
若世尊作第一難阿難作第二難則破外道
憍慢之心彼作是念弟子猶能伏我何況於
師復次爲滿彼梵志意故作如是說彼梵志
作是念沙門瞿曇一切力士無能伏者一切
西四論中無能報者一切論中爲最上者往昔諸
大論師無能伏者何況我等若彼弟子共我
言論往反於理乃可佛於一切時常欲滿足
人意如其所念而便作之復次佛以阿難作

證此義人彼諸外道於阿難所生信敬處阿難形容端正善知因陀毗陀羅論是故世尊欲以阿難作證此義人令彼外道於此義中生信敬故復次欲現不斷弟子問難故外道法不聽弟子有所難問所以者何若聽弟子問難者或時令師墮負處門若師墮負處門者則失利養如舍利弗等百千萬億諸大論師所立問難猶無有能共佛等者何況能勝是故佛法不斷弟子問難復次爲現慳法斷故外道所以不聽弟子問難彼作是念或能因是事故多得利養佛則不爾若令一切世人多得利養乃至無有施佛毫末者如來終無異相之言復次欲現善說法中所說具足同於一見無異意故外道法中師所說異弟子所說異師所解異弟子所解異善說法中

西四

五

無如是過如師所說弟子亦爾如師所解弟子亦解於文句義終無有異是故欲現善說法中所說具足同於一見無異意故世尊作第一難阿難作第二難以是事故而不制止阿難所難問曰外道自作是說眼不見色耳不聞聲是名聖修根世尊難言若然者盲聾之人是聖修根則順他說云何名難答曰佛作是說是名大難斷他所說亦名總說諸外道過若眼不見色耳不聞聲名聖修根者汝等何爲捐棄居家除去飾好修行梵行但當害於二根便是聖人是故佛說名爲大難斷他所說亦名總說諸外道過衛世師復說五根謂眼耳鼻舌身根如僧法經復說十一根謂五覺根五事根五覺根者謂眼耳鼻舌身根五事根者謂語根手根脚根大便根小便

根意根第十一或有說百二十根者謂兩眼根兩耳根兩鼻根舌根身根意根命根五受根信等五根如是等有二十根地獄趣有二十畜生趣有二十餓鬼趣有二十人趣有二十天趣有二十阿修羅趣有二十復有說者諸外道不說百二十根說有百二十主如天主龍主阿修羅主人主如是等上妙之身經百二十處然後得般涅槃彼婆羅門聞說是語心轉疑惑不知何者是實爲說一根者爲說乃至百二十根者彼聞釋種生太子有三十二大人相以自莊嚴身有八十種隨形好純黃金色圓光繞身一尋觀無厭足出家求道得一切智見能斷一切疑與一切決定盡一切問難邊際我應往問即詣佛所到已問訊世尊廣說如上爾時生聞婆羅門白佛言

沙門瞿曇說諸根者多爲有幾根問曰何不作如是問九十六種一一道中爲說有幾根答曰彼婆羅門雖復黠慧其性詭曲有如是念若我作如是問者沙門瞿曇當選好者而說佛告婆羅門有二十二根謂眼根乃至知已根如來說如是等根能攝一切根義汝婆羅門若有人言沙門瞿曇所說諸根我能遮止更說餘根但有是言而無有實若還問者亦不能知反生愚惑所以者何非其境界故問曰何故復作是說若有人言乃至廣說答曰欲止彼人先所聞或說一根者乃至說百二十根者皆非如實我雖有一切智見不能於二十二根減一根說二十一增一根說二十三何況外道小智小見邪慧之者以是事故彼婆羅門往詣佛所但問諸根不問陰秉

入真諦沙門果緣起助道法問曰二十二根名有二十二實體有幾答曰阿毗曇者作如是說二十二根名有二十二實體十七彼作是說五根更無別體謂男根女根未知欲知根知根知已根問曰彼何故說男根女根無別體答曰彼說身根外更無男根女根別體如說云何男根答曰身根少分云何女根答曰身根少分何故三無漏根無有別體答曰九根之外更無三根者別體九根者意根樂根喜根捨根信等五根此九根有時名未知欲知根有時名知根有時名知已根在見道時名未知欲知根在修道時名知根在無學道時名知已根復次在堅信堅法身中名未知欲知根在信解脫見到身證身中名知根在慧解脫俱解脫身中名知已根所以者何

九根合聚名未知欲知根九根合聚名知根九根合聚名知已根以是事故說三無漏根無有別體是故說根名有二十二實體有十七尊者曇摩多羅作如是說二十二根名有二十二實體有十四向說五根無有別體更說三根亦無別體謂命根捨根定根問曰彼何故說命根無別體答曰命根是心不相應行陰彼說心不相應行陰無有別體何故說捨根無別體答曰彼說苦受樂受外更無別捨受諸所受若苦若樂不苦不樂云何名受問曰若然者云何通佛經佛經說有苦受樂受不苦不樂受答曰彼作是說樂受或時上或時下或時黠慧或時不黠慧或時寂靜或時不寂靜苦受亦爾若樂受中下者苦受中下者樂受中不黠慧者苦受中不黠慧者樂

受中寂靜者苦受中寂靜者是名不苦不樂受此不決定在一分中其猶如疑無有決定問曰何故說定根無有別體答曰彼作是說心外無別定根如說云何定根答曰一心是也是故彼說二十二根名有二十二實體有十四尊者佛陀提婆作如是說二十二根名有二十二實體有一謂意根彼說有爲法作二分一四大分二心分四大之外無別造色心外更無別數法彼作是說諸色是四大差別諸無色根是心差別是故說二十二根名有二十二實體有一謂意根評曰如前說者好名有二十二實體有十七知名體名假體假名異相體異相分別名分別體知名知體亦如是此是根體乃至廣說已說體性所以今當說何故名根根是何義答曰威勢義是

根義明義是根義異義是根義喜觀義是根義勝義是根義最義是根義主義是根義問曰若威勢義是根義者一切有爲法展轉有威勢無爲法於有爲法亦有威勢如是一切有爲法盡應是根佛何故獨立此二十二法爲根尊者波奢說曰佛世尊決定知法相亦知勢用餘人所不知若法有根相者立根若法無根相者不立根復次威勢緣或有下者或有上者或有減者或有增者若上者增者立根若減者下者是非根法復次雖有爲法展轉有威勢無爲法於有爲法亦有威勢不如二十二根威勢無明義無異義無喜觀義無勝義無最義無主義如一切衆生展轉有威勢緣或有勝者如閻羅王於地獄衆主師子王於獸中封主於村中王於國中轉輪聖

王於四天下自在天王於欲界梵天王於千世界佛於三界佛有如是威勢勝一切衆生如是一切有爲法雖展轉有威勢無爲法於有爲法有威勢不如二十二根威勢有明義乃至主義以是事故威勢義明義乃至主義是根義問曰若威勢義是根義者於何處有威勢耶答曰眼根於四處作威勢緣勝一自莊嚴身二護自身三爲眼識及眼識相應作所依四獨能見色自莊嚴身者雖有妙身一切支體具足若無眼根則無威勢耶

護自身者耳根能聞好不好聲好者從之惡者避之令此身久住爲耳識及耳識相應法作所依者耳識及相應依耳根生獨能聞聲者耳根能聞聲餘二十一根所不能復有說者眼根擁護生身作威勢緣勝如偈說

譬如明眼人 能避險惡道 世有聰明人能遠離諸惡

耳根擁護法身作威勢緣勝如偈說

多聞能知法 多聞能遠離 多聞捨無義

多聞到涅槃

復有說者此二俱擁護生身法身作威勢緣勝擁護生身者如上說擁護法身者眼根親近善知識作威勢緣勝耳根從其聞法作威

勢緣勝親近善知識從其聞法能生內正思惟如法修行以是事故經作是說梵摩喻婆羅門二根不壞謂眼根耳根問曰何故於諸根聚中說二根不壞答曰以此二根能解知佛時能入佛法門故復次以此二根能解知佛法如說比丘當知若不能如實知他心者應以二處觀察如來一以眼觀色二以耳聽聲鼻舌身根於四處作威勢緣勝一莊嚴自身二護自身三能爲鼻識舌識身識及相應法作所依四鼻獨能艱香舌獨能知味身獨能覺觸莊嚴自身者雖有妙身一切支體具足若於此三根無一根者則無威勢護自身者以此三根故能食搏食令身久住所以者何以搏食是香味觸入故爲三識及相應法作所依者依此三根能生三識鼻根獨能艱

香者鼻根能艱香餘二十一根所不能舌根獨能知味者舌根獨能知味餘二十一根所不能身根獨能覺觸者身根獨能覺觸餘二十一根所不能意根於二處作威勢緣勝一今未來有相續二自在今他隨順令未來有相續者如說佛告阿難若識不在母身名色成迦羅羅不答言不也自在今他隨順者如諸比丘當知心能將世間能生世間若心生處皆得自在復有說者意根於煩惱出要二處作威勢緣勝煩惱處勝者如說心煩惱故衆生煩惱出要處勝者如說心出要故衆生出要男根女根於二處作威勢緣勝一異衆生二分別衆生古昔時人無有男女以少造色生故別便有男女廣長形異顏色言語衣服飲食皆悉有異復有說者男根女根於煩

惱出要二處作威勢緣勝煩惱處勝者不以
婬欲合會故勝所以者何此處應爾不足生
疑若有男根女根者能受惡戒能斷善根令
此身中無善種子能作五無間業如是等事
黃門般吒無形二形所不能作出要處勝者

若此二根不壞能受逮解脫戒能生禪戒無
漏戒能離欲愛色無色愛能生佛種子及聲
聞辟支佛種子如是等事黃門般吒無形二
形所不能作命根於二處作威勢緣勝一言
有根二今諸根不斷隨幾時活言有根死已
言無根隨幾時活諸根相續死已諸根不相
續復有說者命根於四處作威勢緣勝一令
此生相續二擁護此生三能持此生四今此
生不斷五受根於煩惱分中作威勢緣勝衆
生以受故四方追求行鐵鎌道及鉤道索道

西四

十二

一一一五七

上登越高山入於大海有無量畏難所謂波
浪洄渦難失獸摩羅難黑風旋風難水中伏
山難沒水難漂在沙上難墮惡龍宮難墮羅
刹國難如是等種種追求皆爲受因問曰無
漏受云何於煩惱分作威勢緣勝答曰無漏
受以方便初生時於煩惱分作威勢緣勝行
者欲生無漏受時亦須追求衣服飲食資生
之物是故亦於煩惱分中作威勢緣復有說
者受根於煩惱出要分作威勢緣勝樂受於
煩惱分作威勢緣勝者如說樂受爲愛所使
出要分中作威勢緣勝者如說心樂則定苦
受於煩惱分中作威勢緣者如說恚使使苦
能生信不苦不樂受於煩惱分中作威勢緣
勝者如說無明使使不苦不樂受不苦不樂

受於出要分中作威勢緣勝者如說依六出
要捨觀行信等五根於出要分中作威勢緣
勝者如說有信者能親近善人亦如偈說
信能度流越放逸海精進除苦慧到彼岸
復如說若我弟子以信爲障故則能障不善
西四十三
外敵修行善法如佛告阿難精進能生菩提
若我弟子具足精進身者能捨不善法修行
善法如說念是偏法若我弟子以念守門者
能捨惡法修行善法如說定是正道不定是
邪道定心得清淨非不定心定能知諸陰生
滅若我弟子能具足三昧華鬢者則能捨
惡法修行善法如偈說
慧爲世間上能起眾離者亦能如實知
能盡老死苦
亦說慧於一切法中爲無有上亦說姊妹當

知我諸弟子以慧刀斷一切結繫使垢纏復
說若我弟子具足智慧城者能捨惡法修行
善法未知欲知根於未曾見而見法作威勢
緣勝知根於已曾見法能除過患作威勢緣
勝知已根於已除過患得現法樂作威勢緣
勝如是等諸根於如是等諸法作威勢緣勝
尊者瞿沙跋摩作如是說實義應說一根謂
意根所以者何意根有三事一在內二偏一
切處三能有所緣在內者內入所攝偏一切
處者從阿毗地獄上至有頂可得能有所緣
者緣一切法餘根不具三事眼耳鼻舌身根
雖是內入攝不偏一切處不能有所緣命根
雖偏一切處亦不內入攝不能有所緣除捨
根餘受根雖能有所緣非內入攝不能偏一
切處捨根信等五根雖偏一切處能有所緣

非內入所攝三無漏根更無別體諸根合聚立此三根如上說問曰若然者其餘諸根以何事故得名爲根答曰爲意根作所依作依作煩惱作出要作出要處誰作所依答曰眼耳鼻舌身根誰作依答曰命根誰作煩惱答曰諸受根誰作出要答曰信等五根誰作出要處答曰見道修道無學道問曰男根女根以何事故得名爲根答曰以四事故一能有所生二能生欲樂三能制煩惱四能爲染污識及相應法作所依能有所生者生胎生卵生能生欲樂者行欲之人此處生樂偏身中如聖人眉間生聖樂偏在身中彼亦如是制煩惱者須臾間斷能爲染污識及相應作所依者餘所依生三種識或善不善無記此二所依唯生染污愛相應相親近識尊者僧伽

婆修說曰命等六根是實義根命等六根者謂眼耳鼻舌身命根所以者何此六是衆生根本問曰若然者餘根以何事故得名爲根答曰此六是衆生根本根本以何爲種子誰令其煩惱謂五受根誰令其出要謂信等五根何處得出要謂見道修道無學道男根女根以何事故得名爲根答曰欲界衆生以欲爲苗稼種子從何處而有皆從男根女根尊者瞿沙說曰命等八根是實義根命等八根者謂眼耳鼻舌身男根女根命根所以者何此是衆生根本問曰若然者餘根以何事故得名爲根答曰此八是衆生根本根本以何爲種子謂意根誰令其煩惱謂五受根誰令其出要謂信等五根何處得出要謂見道修道無學道問曰如身根微塵從足

至頂盡徧何故此處所身根名男根女根非
餘處所耶尊者和須密說曰以此處所故分
別是男是女問曰若然者二形人亦名男亦
名女耶答曰此不名男亦不名女復次此處
所能生增長人寂靜人增長人者如富蘭那
等六師寂靜人者謂佛辟支佛聲聞尊者佛
陀提婆說曰此處所能生諸仙能生牟尼能
生善調伏者能生善共住者已總說諸根所
以今當一一別說云何眼根答曰若眼已見
色今見色當見色及餘彼分眼已見色是過
去眼今見色是現在眼當見色是未來眼及
餘彼分眼者廣說如男處乃至意根說亦如
是云何女根答曰身根少分云何男根答曰
身根少分云何命根答曰三界中壽云何樂
根答曰因觸生樂受若在身若在心覺樂能

忍是名樂根云何苦根答曰因觸生苦受在
身覺苦不可忍是名苦根云何喜根答曰因
觸生喜受在心覺喜能忍是名喜根云何憂
根答曰因觸生憂受在心覺憂不可忍是名
憂根云何捨根答曰因觸生不苦不樂受若
在身若在心覺不苦不樂非可忍非不可忍
是名捨根云何信根答曰於遠離寂靜善法
生信若信是法善信有是分別受其事取其
相如是淨心是名信根精進根念根定根慧
根廣說如經本云何未知欲知根答曰不見
西四十六
人不得決定人所有學慧慧根及諸餘根堅
信堅法人未見四諦當見四諦是名未知欲
知根不見人者謂不見諸諦人不得決定人
者不於諸諦得決定所有學慧慧根者則說
慧根諸餘根堅信堅法所用八根未見四諦

當見四諦則說八根如是等九根合聚名未
知欲知根問曰彼根聚中何故再說慧根一
說餘根耶答曰以名勝義勝故彼根聚中慧
名勝義亦勝復次慧說名前導如說比丘當
知種種善法生時慧爲前導慧爲前相次有
慚愧復次慧於三事得決定一於見得決定
二於緣得決定三於事得決定彼相應法於
二事得決定於緣得決定於事得決定非於
見得決定所以者何非見性故非相應共有
法得一決定謂於事得決定非見決定非見
相故非緣決定非緣法故復次若以慧見煩
惱時煩惱則不得久住如穴居衆生人若見
時便還入穴彼亦如是復次若身中有慧照
則煩惱賊不能偷劫猶如屋中有燈照者賊
則不能偷劫彼亦如是復次以慧能照一切

法外物如日月藥草摩尼珠諸天宮能照一
界一入一陰一世少分一界少分者謂色界
一入少分者謂色入一陰少分者謂色陰一
世少分者謂現在世慧能照十八界十二入
五陰三世及無爲法復次無慧者縛有慧者
解復次佛出世時入佛法者以慧而自娛樂
佛法以知解爲勝譬如目之人能至寶處
如是有慧眼者能至佛法寶處譬如盲人雖
往寶處而無所見惡慧之人入佛法寶處亦
復如是復次慧名爲將亦名爲眼亦名爲頭
亦名爲覺亦名覺支亦名爲道亦名道支復
次慧名爲眼餘助道法名爲盲如衆多盲人
一有目者而將導之令行正路彼亦如是復
次慧斷煩惱刀如說姊妹當知聖弟子以智
慧刀斷一切結縛使垢纏復次慧說名爲堂

如尊者阿尼盧豆所說我依戒立戒昇無上智慧堂復次慧能立別相總相法能解別相法能解總相法能破自體愚能破緣中愚於諸法中得不顛倒復次慧是諸佛所愛敬諸佛不愛敬人色族財富愛敬有慧者復次諸佛以慧故而有差別非以色族財富等以如是事故慧則再說餘根一說云何知根見人決定人所有學慧慧根及諸餘根信解脫見到身證已見四諦重見四諦是名知根見人者見諸諦決定人者於諸諦決定所有學慧根則說慧根諸餘根信解脫見到身證所用八根見四諦重見四諦則說八根如是等九根合聚名知根問曰如無學人重見四諦如退法至憶法憶法至護法護法至等住等住至能進能進至不動何故唯說學人不說

無學人耶答曰應說無學而不說者當知此說有餘復次若說始當知亦說終若始說學當知終說無學如始終初入已度方便畢竟說亦如是復次斷未曾斷結得未曾得果者說名重見無學不斷未曾斷結不得未曾得果故不名重見復次若斷未曾斷煩惱得證未曾證解脫得是名重見無學雖證未曾證解脫得而不斷未曾斷煩惱故是故不說如斷煩惱得證解脫得除過患修功德捨穢惡取勝妙去無義取有義盡渴愛受無煩熱樂當知亦如是復次斷未曾斷無知得未曾得智是名重見無學雖得未曾得智不斷未曾斷無知謂染污無知以如是等事故唯說學重見諦不說無學云何知已根答曰若漏盡阿羅漢無學所有慧慧根解脫俱解脫所用

諸根能生現法樂是名知已根漏盡阿羅漢所有慧慧根則說慧解脫俱解脫阿羅漢所用諸根能生現法樂者則說八根如是等九根合聚名知已根問曰學人亦有現法樂何以但說無學答曰應說如說無學現法樂亦

西四

十九

應說學現法樂復次若說終當知亦說始說畢竟當知亦說方便說已度當知亦說初入

復次以名勝義亦勝故若以法而言無學法勝於學法以人而言無學人勝於學人復次無學人所有猗樂不爲煩惱所覆學人雖有猗樂爲煩惱所覆復次若受猗樂時寬博廣大是說現法樂學人有所作故受猗樂時不寬博廣大不名現法樂無學人無有所作受猗樂寬博廣大故名現法樂譬如今王於諸怨敵未盡降伏所受快樂不寬博廣大彼亦

如是復次若無煩惱意語亦滿諸牟尼是說現法樂復次若受現法樂不受後樂是名現法樂學人受現法樂亦受後樂故不名現法樂以如是等事故無學猗樂名現法樂學人猗樂不名現法樂

阿毗曇毗婆沙論卷第五十四

音釋

緻直利黠胡八切 鼻許救切以鼻 洗泗
切慧也 鼻搘氣曰鼻 泗泗
回渡音伏洄 翳莫班 猗於宜切
水也 翳切 猗輕安也